

PRAVILNIK O ČLANARINI/VAZIFI

Član 1.

Članstvo u islamskoj zajednici Bošnjaka Kantona Aargau (dalje u tekstu „IZBA“) je na dobrovoljnoj osnovi. Odluku o primanju u redovno članstvo donosi Upravni odbor na temelju pismenog zahtjeva, molbe ili pristupnice osobe koja želi postati član IZBA. Nakon odluke o primanju u članstvo, osoba je dužna platiti članarinu za tekuću godinu, i tek nakon toga postaje punopravni član

Član 2.

Članovi se obavezuju da doprinose i unapređuju rad i poslovanje IZBA. Svi članovi IZBA imaju ista prava, obaveze i odgovornosti, a posebno:

- pravo sudjelovati u radu IZBA
- pravo birati i biti birani u tijela IZBA, shodno postojećem pravilniku
- pravo biti informirani o cjelokupnom radu
- obavezu plaćati članarinu
- obavezu da se pridržavaju islamskih normi, te da štite islamske vrijednosti i običaje
- obavezu da se pridržavaju statuta, odluka skupštine i upravnog odbora IZBA
- obavezu da čuvaju ugled IZBA,
- pravo koristiti prostorije džemata za privatne svečanosti vjerskog karaktera, te
- pravo ostvarivati i druga prava predviđena općim aktima IZBA-e kao npr. neposredan pristup imamu za sva vjerska pitanja, kao i za savjetovanja iz oblasti porodičnog prava i odgoja djece; vanredne usluge imama, za eventualne obrede prilikom akike, sunnečenja muške djece, šerijatskih vjenčanja, dova povodom useljenja u novu kuću ili stan, posjeta bolesnih, iznemoglih i ugroženih, kupanje umrlih, dženaza i obilazak porodice umrlih itd.; islamsko obrazovanje i edukacija putem mekteba, predavanja, tribina, kurseva i drugih obrazovnih metoda

Član 3.

Članarina koja garantuje punopravno članstvo u IZBA-i se plaća po domaćinstvu, po principima definiranim u sljedećim članovima ovog pravilnika

Član 4.

Članarina bračnih drugova, ili samohranih roditelja, ili roditelja koji imaju podijeljeno skrbništvo nad djecom, obuhvata i njihovu djecu, usvojenu djecu, pastorčad i siročad do navršениh 25 godina života, pod uslovom da se nalaze u istom domaćinstvu i odgojno-obrazovnom procesu u nekoj od priznatih obrazovnih institucija.

Član 5.

Ukoliko u zajedničkom domaćinstvu žive i roditelji (jedan ili oba), oni su obavezni plaćati odvojeno džematsku članarinu kako bi bili tretinari punopravnim članovima. Ovim pravilnikom oni se tretiraju zasebnim domaćinstvom.

Član 6.

Ukoliko u zajedničkom domaćinstvu žive djeca starija od 20 godina, a ne nalaze se u u obrazovnom procesu, bez obzira da li bili u radnom odnosu, i bez obzira da li su oženjeni/udati ili nisu, oni su za period boravka u istom domaćinstvu obavezni plaćati dodatnu džematsku članarinu u iznosu od 100 CHF.

Član 7.

U slučaju razvoda braka, bračnim drugovima prestaje zajedničko članstvo u IZBA, s tim da oni ne gube dotle stečena prava, ukoliko se u roku od 3 mjeseca, svako ponaosob na ime novog domaćinstva, učlani u IZBA.

Član 8.

Visina članarine po domaćinstvu iznosi 300 CHF. (Primjer: Ukoliko u jednom domaćinstvu žive suprug i supruga, njihova članarina iznosi 300 CHF; u slučaju da u istom domaćinstvu žive sa svojom djecom ili roditeljima, članarina se reguliše shodno članu pod rednim brojem 4, 5 i 6.

Član 9.

Penzioneri također plaćaju članarinu u iznosu od 300 CHF po osobi. U slučaju da su ispunjeni uslovi socijalne ugroženosti, koju je potrebno dokazati uz odgovarajuću potvrdu zavoda za socijalni rad, isti se oslobađaju plaćanja članarine.

Član 10.

Socijalno ugrožena domaćinstva, i pojedinci, koji nisu u stanju plaćati džematSKU članarinu, oslobađaju se iste, pod uslovom da Upravnom odboru dostave dokumentaciju koja će pokazati nemogućnost plaćanja članarine.

Član 11.

Sve neopravdane uplate manje od 300 CHF po osobi računati će se kao dobrovoljni prilozi ili sadaka i biti će proslijeđeni u naš humanitarni fond.

Član 12.

Za članarinom obuhvaćene članove domaćinstva, koji su plaćali godišnju članarinu u iznosu od 300 CHF, u slučaju vlastite smrti ili smrti neke od osoba koje su obuhvaćene njegovom članarinom definirano članom 4 ovog pravilnika, IZBA se obavezuje preuzeti troškove kompletnog procesa pripreme i održavanja dženaze, a u maksimalnom iznosu od 3000 CHF. Ovime obuhvaćeni su troškovi kompletne pripreme umrle osobe za dženazu, prijevoz unutar Švicarske ili prijevoz do matične države, kupanje (gasul), ćefini i ostali materijali i sredstva koja su neophodna prilikom pripreme umrle osobe, kao i vjerske usluge.

Član 13.

Porodica umrle osobe je dužna prvo obavijestiti imama IZBA o smrtnom slučaju, a naredne korake poduzima sam imam u saradnji sa pokopnim društvom sa kojim IZBA ima ugovor.

Član 14.

Pravo na navedene usluge iz člana 12 imaju samo one džematlije koje su punopravni članovi džemata, minimalno (najmanje) 1 godinu (tekuća godina) prije smrtnog slučaja

Član 15.

Članovi IZBA, koji ne ispunjavaju uslove iz člana 14 imaju pravo na besplatan vjerski čin odnosno klanjanje dženaze, dok sami snose sve troškove proistekle iz pripreme dženaze za umrlu osobu i prijevoza do mjesta ukopa umrle osobe.

Član 16.

Ukoliko članstvo u IZBA iz nekog razloga bude prekinuto u periodu od godinu dana i više, članovi domaćinstva o tome su dužni obavijestiti UO IZBA. Da bi se ponovo učlanili, dužni su retroaktivno uplatiti propuštene godine te članarinu za tekuću godinu

Član 17.

Svaki član IZBA je obavezan da u potpunosti i istinito dostavi podatke o sebi i članovima svoje porodice. Svaku promjenu bračnog i porodičnog stanja, mjesta boravka odnosno adrese stanovanja kao i broja telefona ili mail adrese, član IZBA je dužan o tome obavijestiti Upravni odbor

Član 18.

Članstvo u IZBA prestaje u sljedećim slučajevima:

- istupom, tj. samostalnim isključenjem
- brisanjem, zbog neplaćanja članarine
- isključenjem od strane Upravnog odbora ili Skupštine, zbog kršenja statutarnih odredbi i pravilnika. Na takvu odluku Upravnog odbora član može podnijeti prigovor Skupštini u roku od 14 dana od dana donošenja odluke. Odluka Skupštine je konačna.
- smrću

Dodatak:

Pojašnjenja procedura vezanih za smrtni slučaj

1. Nakon nastupanja smrtnog slučaja najbliži članovi porodice umrlog su dužni o tome odmah obavijestiti imama IZBA.
2. Potrebna dokumenta kao što su pasoš, lična karta, potvrda o smrti, vjenčani list (internacionalni, inače sa prijevodom na jezik zemlje boravišta) potrebno je dostaviti UO IZBA ili pokopnom društvu, kojeg ovlasti IZBA odnosno sa kojim IZBA ima ugovor.
3. U slučaju kada smrt nastupi kod kuće potrebno je da ljekar izda uvjerenje o smrti. Troškove ljekara, kapele ili izdavanja potvrde o smrti snosi porodica preminulog člana. IZBA ne učestvuje u plaćanju ovih troškova.

4. Za eventualna kašnjenja zbog državnih praznika ili zbog nedostatka dokumenata IZBA ne snosi odgovornost.
5. U slučaju da članovi porodice umrlog, bez koordinacije sa upravnim tijelima IZBAe za pripremu dženaze ovlaste neko pogrebno društvo, IZBA zadržava pravo ne učestvovati u preuzimanju troškova oko organizacije ukopa
6. Za člana IZBA, koji je umro izvan zemlje boravka, IZBA ne može organizirati prijevoz. Nakon prikaza računa troškova transporta mogu se prema uslovima opštih poslovnih pravila preuzeti usporedni troškovi za prijevoz iz zemlje boravka do zemlje porijekla umrle osobe. (max 3000) Ukoliko se desi smrtni slučaj u domovini umrlog onda se plaćaju računi opremanja i ukopa.
7. Za članove koji budu sahranjeni u zemlji boravka, troškovi mogu biti preuzeti. Kao gornja granica ovih troškova važe troškovi za prijevoz u Bosnu i Hercegovinu. Troškovi i takse za grobno mjesto se ne mogu preuzeti.